

Brida de Castelberg schefmedia en il maternité a Turitg

DA CLAUDIA CADRUVI/ANR

En sez en crusch sesa Brida de Castelberg sin il canapé. Igl è l'ina. Probabel fissi las uras per sia curta pausa da mezdi. Ma Brida de Castelberg pren peda per raquintar da ses spital, da sia lavur e da sasezza. Avant mezdi ha ella operà. Suentermesdi vegnan pazients privats ed i dat anc sesidas. Ses di da lavur ha dudesch uras – minimum e normalità.

Chirurgia ed anc ginecologa

Per ella èsi adina stà cler ch'ella daventia media. Ella aveva en il chau il maletg da ses anteriur medi da famiglia, che fascheva anc visitas a chasa. Sche lez gieva puspè ord chasa, eran ins puspè sauns, raquinta de Castelberg. Il studi da medischna ha ella fatg tgunsch. Uschia è ella suenter sa spezialisada en la chirurgia. «Tar ina chirurgia na vegnan ils pazients betg voluntariamain. Sin il pli da mesanotg, sch'i n'è nagin um denturn ch'è chirurg.» Quai ha Brida de Castelberg pensà cura ch'ella aveva suenter set onns ses diplom da spezialista en satg. Uschia è ella anc ina giada sa messa en ils stadals ed ha cumenzà a far il «medi spezialist» en la ginecologia. Ella è oz la suletta dunna en Svizra ch'è sa spezialisada en omadus champs, e per dumbrar ils umens cun la medema scolaziun na dovra ins era betg in entir pugn.

Era eleger mintgatant in um

Atgnamain aveva ella vuli arver ina atgna pratica. La dubla spezialista è dentant l'emprim daventada schefmedia en il maternité a Turitg. Igl è il spital da dunnas sper il Triemli. Là è ella lura restada enfin oz ed i plascha ad ella. «Jau operesch fitg



Per avair sezza uffants n'hai mai tanschi. Persuenter s'occupescha Brida de Castelberg cun cor ed olma dal «maternité» a Turitg.

ANR

gugent. Ma era la tgira ed il discurs cun ils pazients interessesch mai. Plinavant èn ins l'entir di sfurzadamain ensemen cun glied ch'ins na sa dess betg giu privat.» L'ultima remartga fa ella cun in surrir.

Era sch'ella raquinta ch'ella haja scrit ora dacurt ina piazza per «in medi» e na «in/a medi/a», fa ella ina fatscha in zichel maliziusa. E daco ha ella tschertgà in um sco medi en ina clinica per dunnas? Ella haja en ses team da 12 medis era gugent dus enfin trais umens. Quai saja bun per il clima da lavur.

Tattas emprendan puspè da far sitg

La istorgia dal maternité va enavos sin il 1908 ch'igl è vegni fundà a Turitg ina societad per proteger mammas ed uffants. La societad è cunzunt s'engaschada per mammas senza um. Quest spiert n'è anc oz betg sa pers. «Nus essan era ina buna instituziun sociala», di Brida de Castelberg e dumbra si blers servetschs ch'èn integrads en la clinica. Ins dispona p.ex. d'in lavurer sozial e d'ina chasa d'uffants. I dat purschidas da scolaziun per mammas, babs e schizunt per tattas che han emblidà co ins ha quità da pops.

«En la chasa da dimora per mammas avain nus la pussaivladad da prender si sis dunnas che pon restar in onn.» Quai sajan per ordinari dunnas fitg giuvnas che spetgan in uffant – per part anc sezzas mat-tatschas. Loscha è de Castelberg era ch'ina enconuschenta ginecologa per uffants ha uss spustà sia pratica en il maternité.

Pops da tuttas colurs

Igl è dunnas ord ils cirquits trais, quatter e

tschintg che sa laschan operar en il maternité u vegnan per parturir. Uschia neschan là pops da tuttas colurs. Tut tenor nazionalità vegnan las dunnas che partureschan accumpignadas schizunt da la mamma u da la sira. Ils umens sajan uss – n'emporta betg tge nazionalità – adina era preschent. Ed è quai bun? «Jau chatt ch'igl è bun sche l'um ha la schelta», di de Castelberg. Mintgatant sajan ils umens era tut sa pers. In part na saja betg chaussa per mintgin. Ma per il mument vegnia questa disa betg messa en dumonda.

Temp da lavur per assistents e medis

Era en il team da Brida de Castelberg han ils medis assistents fatg chauma l'onn passà. En ils novs contracts da lavur èsi uss perscrit in emna da «be pli» 55 uras. Uschia ha era il maternité duvrà dapli medis. En ils eglis da la schefmedia èsi dentant fallà, sch'ins engascha uss dapli assistents per dumignar la lavur. I saja da pajar endretg ils medis da spital, uschia che la buna glied na giava betg davent. Cun adina dapli assistents s'augmenta il dumber da medis incuntin ed ils custs sin il sectur da sanadad creschian vinavant.

Curt e bun

Num: Brida de Castelberg
Naschida: 1952 a Zug
Lieu da burgais: Mustér
Segn: stadaira
Spaisas preferidas: fondue da chaschiel u curry thailandais
Autur preferì: John Irving
Actura preferida: Bette Davis

